

NSRLM-i Sechü Zubza nung district level credit camp ayongzük



Kohima, Tsüklai/February 05 (TYO): Nagaland State Rural Livelihood Mission (NSRLM) den District Mission Management Unit (DMMU) Kohima district ajanga "Lakhpati Didi" scheme tenzükba sentong den külemi Sechü Zubza nung yashi district level Credit Camp ka ayongzükba liasü.

Iba camp ayongzükba nükjidong teratet jembidang Rajusolie Lhousa, State Programme Manager (Financial Inclusion) NSRLM ajanga ashiba agi, district level Credit Camp ya Ato Kilonser Narendra Modi-i linük tesem ajungalen semzüksüba Lakhpati Didi scheme nung shilem ka lir.

Taoba küm Independence Day mapang linük nung yimtsüngtem nung Lakhpati Didi crore ana kumdaktsüsü Ato Kilonseri sangdonga liasü, ta Lhousa-i ashi.

Paisa ashiba agi, Union Finance Minister Nirmala Sitharaman-i February 1, 2024 nü interim budget benokdang Lakhpati Didi scheme ya tetsür crore ana masü asem dak rangloker ta sangdonga liasü.

Iba nung Lhousa-i state nung aliba tetsür Self Help Group

(SHG) tem dang project balala inyaka 'Lakhpati Didi' akumtsü ajungshia liasü.

Branch Manager, State Bank of India (SBI) Sechü Zubza, Kekhrievonuo Ciesotsuia SBI kübok loan scheme balala indang rasaa ashi.

Lai tetsür SHGs tem dang SHG loan agitsü ayongzükme kechiaser yangji interest rate ajema agütsür.

Nüburtem takum jenjang ajungkettsü asoshi tetsür SHGs yaritsü SBI teti renema lir ta lai metetdaktüsü.

Iba sülen lai Sechü Block kübok SHG asem nem sanction letter amokja liasü.

Financial institution balalai SHG nem loan agütsüba maparen temelaba nung inyaktsüba atema Keduseho, Field Officer, Nagaland State Co-operative Bank, Kohima ajanga NSRLM nem tenüngsang agüja liasü aser mapang shidak nung loan menoktsü aser tim lenmang nung amshitsü ayongzükba liasü.

Keduseho-i tetsür SHG tem dang book keeping nung temulung agütsütsü ashi aser loan bushiba mapang kulizüng kaket tejangja agütsütsü ashi.

Paisa SHG tem dang financial institutions nungi

teyari tali angutsü mechi banking nung ochishia alitsü ayongzükba liasü.

Iba sentong nung Pelebeituo Peter Solo, District Coordinator (Financial Inclusion) ajanga Kohima district nung SHG jenjang asadanga jembidang, Kohima district kübok SHG 1336 lir aser yangji züngsem 10,221 lir ta ashi.

Videtonu Phinyo, Area Coordinator (Financial Inclusion) Sechu Block ajanga credit linkage nung Sechü block indang jenjang lemsatepa liasü aser Sechü Block kübok SHG 138 lir ta ashi.

Loan agir Viketuno Edith Rutsa aser Sabita Thapa nati takok otsü lemsatep aser parnok business ajungkettsüba atema NSRLM aser financial institutions dang pelaba lemsatepa liasü.

Iba sentong nung Vikepelie Mejura, Block Programme Manager, Sechu Block ajanga pela agizükba o jembidi, Hovidil Kweho, Area Coordinator (Livelihoods) menden liasü aser Kevinono Kosa-i sentong tenzükba sarasadem.

Maneni Block Level Federation, Sechü Block tir Nisorieno Meyase-i melepzüng o jembia liasü.

SAS Campus nung Scientific Beekeeping training agütsütsü

Dimapur, Tsüklai/February 05 (TYO): AICRP (HB & P), ICAR, SAS, NU, Medziphema ajanga February 16, 2024 nü SAS Campus, Medziphema nung Scientific Beekeeping (Honey bees & Stingless bees) indang training agütsütsü.

Iba training nungya menden 100 dang alitsü aser yimtsüng shia nungi iba training nung adentsü jangra aliba ninang

metsür 10-15 tsungta yoktsü akok mesüra menden aliba apir yoktsüla, ta Dr. Avinash Chauhan, Principal Investigator & Scientist, All India Co-ordinated Research Project on Honey bees and Pollinators, ICAR, School of Agricultural Sciences, NU, Medziphema ajanga sangdong ka nung ashi.

Iba anogo atema training agir nem lumpsum allowance (D/A)

agütsütsü aser training agirtem nem stock nung aliba nungi ninang metsüba nung amshiba oset agütsütsü.

Iba training nung adentsü jangra alirtemi tekeraba nung tenüng aser phone number agütsütsüla aser ano osang tali tejangjaba nung metetpelatsü aser registration atema mobile number 7005677985 nung jembitsü akok, ta Dr. Chauhan-isa ashi.

BJP Mokokchung district ajanga kitsük-kirong lendong ajura alir semdang



Dimapur, Tsüklai/February 05 (TYO): Tir S Bendang Aier-i anir BJP Mokokchung District aser Deputy Commissioner office, Mokokchung nung aliba district ketdangsürtemi Honibar anung MMC Complex, Mokokchung

nung kitsük-kirong lendong ajurur alirtem dang temeim sayuba mapa inyaka liasü.

Iba tesem nung shishilepartem kitsük-kirong lendong ajanga takoksa ajurur alir asoshi BJP Mokokchung

district ajanga sen 50,000 agüja liasü.

Ajidang masü Mokokchung nung aliba nüburtem nungdakba mapang akok tashi yaritsü mulunga lir ta BJP Mokokchung district ketdangsürtemi ashi.

Western Sumi Hoho-i DGP aser CP nem tenüngsang agütsür

Dimapur, Tsüklai/February 05 (TYO): Director General of Police, Rupin Sharma, IPS aser Commissioner of Police, Dimapur, Kevithuto Sophie, IPS nati dangar dak nungi alia bendanga agütsür mapa inyakba atema temulung süa bilemba lemsateper ta Western Sumi Hoho (WSH) sangdong ka ajanga ashi.

Nagaland nung tzüzüng-ozüng shidak amshiba aser police department nung temelenshi aika bener aruba atema DGP Rupin Sharma dang pelaba lemsateper.

Pai ochishia aser tasü ita nokdakba ajanga state tesem ajungalen yimjung nung lir aser tetsübo mali nüburtem ajangzükur. Nüburtem ajungtsü mechi pai masetshie nokdakba atema kanga pelar, ta WSH sangdong ajanga ashi.

Ajidang masü 75th

Republic Day nung President's Medal anguba atema onok tejak tenteter aser tenüngsang agütsür, koba ajanga pai nüburtem ajungtsü mechi aser pa mapa nung nendaka inyakba kuli sayur.

Ano maneni Commissioner of Police, Dimapur, Kevithuto Sophie, IPS ajanga taxation tebilemtsü kanga junga ketdang asüba aser syndicate system azüoktetba asoshia tenüngsang agütsür, ta ashi.

Pai sentong kanga junga yangluba aser yimya balala nungi ketdangsüba ajanga item tongtipang tebilemtsü azüokkogo aser iba atema pa nem tenüngsang agütsür, ta WSH ajanga ashi.

Maneni state nung law and order wazüka amshitsü mechi bendanga agütsür meranga inyakba atema team ajanga dang pelaba lemsateper, ta sangdong ajangasa ashi.



Feb 3 nü Mokokchung nung MMC complex arungdang takoksa ajururtem nem RD & SIRD Minister, Metsübo Jamiri teyari sen lakh 5 bener yokba 27 Mokokchung town assembly constituency NDPP tir, Tiameren ajanga Mokokchung DC nem amoktsüba mapang tangokba noksa nung angur. Mokokchung, 5th February, 2024

Assam Rifles temi sentong balala agi

Dimapur, Tsüklai/February 05 (TYO): Assam Rifles ajanga Shamator nungi kaketshir 45 aser tesayur ana atema Educational Tour ayongzükba sentong takok ngua tembangogo.

Iba sentong ya January 29, 2024 nü tenzük aser February 5, 2024 nü Shamator nung Assam Rifles Battalion ajanga Flag-in ceremony agia tembanga liasü.

Iba tour nung parnoki Assam kübok Jorhat aser Nagaland nunga Dimapur aser Kohima yimitem nung tongtipang tesemtem sema jaja liasü.

Kaketshir aser tesayur temi iba tour nung ajangshibatem otsü shia liasü.

Parnoki Jorhat nung Air Force Station aser Assam Rifles Dog Training Centre semdang, Karbi Anglong nung Garam Pani, TATA Tea Estate, Mokokchung nung Impur, Dimapur nung

ARTC&S Sukovi, St. Joseph's University, Dimapur, ICAR (Mithun) & ICAR (Agri) aser Kohima nung Nagaland State Secretariat, Cathedral Church aser World War II Memorial semdanga liasü. Iba den külemi parnoki IGAR (N) den sensaksema liasü.

Iba tour tembangba sentong nung civil society organization nungi lenirtem, tsürabortem aser district nung school balala nungi kaketshirtem dena liasü.

Maneni Assam Rifles temi Noklak district nungi teintet rogo 20 atema National Integration Tour ka February 5, 2024 nü tenzükja liasü.

Anogo 12 atema iba tour nung parnoki Agra, Delhi aser Kohima semdangtsü. Iba tour ya ajanga Khiarniungan kin nungi teintet rogo temi pei sobaliba dak alia India nung sobaliba tali tajungba nung angatetsü.

Jharkhand nung JMM-i aniba teloktepi floor test nung takok angu

Ranchi, February 05 (Agencies): Hombarnü Jharkhand assembly nung floor test agia Champai Soren-i aniba JMM teloktepi sorkari takok nguogo.

JMM-i aniba teloktepi vote 47 angu aser sorkar anema agütsüba vote 29 liasü.

Ali tsütsü ochimashi ken o nung Enforcement Directorate-i Hemant Soren apuba sülen pai Chief Minister menden nungi anen aser Champai Soren-i chief minister tenangzükba agia liasü, ajisiaka menden 81 aliba assembly nung Champai Soren-i majority kuli sayutsüsa aküm.

Floor test nungji shilem

agidaktsüsü atema ED-i Hemant Soren assembly-i anir arua liasü. Floor test jakdang assembly nung jembidang Champai Soren-i, nüburtemi shimtetba sorkar chirepdaktsüsü atema asalentong yanglur, ta metetdaktsü.

Sorkar pusema agütsüba vote 47 nungjagi vote 29 Jharkhand Mukti Morcha nungi liasü, Congress nungi vote 16 aser RJD o CPI (ML) na nungi vote kaka liasü.

Anepdang Chief Minister Champai Soren den teloktepi nungi MLA tem assembly tonga ao. Teloktepi nungi MLA temji yasung Hyderabad nungi

Ranchi tonga arua liasü. BJP nem MLA tem memesüzükdaktsüsü atema JMM-RJD-Congress teloktepi par MLA tem Hyderabad nung aliba resort kati yoka liasü.

Assembly nung jembidang Hemant-i, January 31 ya tanak anogo ka lir; tang mezung January 31 nü Chief Minister ka apu aser iba asalentong yangluba nung Raj Bhawan (Angh)-ia shilem agia liasü, ta tai tongloktsü.

Hemant Soren-isa, ali ochimashi ken o nung pai shilem agiba kuli ngura iba anogo nungjisa pai yimtenren toktsüsü, ta metetdaktsü.

ALI TAYOKTSÜ LIR

At Aoyim Village (middle of the village) near 4th Mile, Chümoukedima @300 per sq.ft. (negotiable) No broker, any size land available.
Contact : 8974754265 / 8787392096



New Delhi, February 05, 2024: India nung yimsü balala nungi lenirtemi Parliament House kima Ato kilonser, Narendra Modi ajurudang tangokba noksa nung angur.

Yimsü balala nungi lenir 24-i Parliament nung PM Modi ajuru

New Delhi, Tsüklai/February 05 (Agencies): India nung yimsü balala telongjem sayua Hombarnü Indian Minorities Foundation tenung nung yimsü balala nungi lenir 24-i Parliament-i oa Ato kilonser, Narendra Modi ajuruogo.

Yimsü lenirtem rongnung Sikh, Jain, Khristan aser Parsi nungi lenirtem densema liasü.

Parnok rongnung All India Imam Organisation nung tongti Imam, Umer Ahmed Ilyasi aser Mahabodhi International Meditation Centre tentetsang, Bhikkhu Sanghasena nata liasü.

Tesülen Ato kilonser Narendra Modi-i X ajanga, "Tanü Parliament nung yimsü balala nungi lenirtem ajuruogo. Asen linük terenlok atema

parnoki o tajung lemsatepba asoshi ni parnok dang pelar," ta metetdaktsü.

Yimsü lenirtem rongnung Bharatiya Sarv Dharma Sansad nungi Goswami Sushila liasü.

Senden tembangba sülen Imam Umer Ahmed Ilyasi-i, "Yimsü tulutibaji meimchirtem meimba lir ta onoki osang ka lemsatepnüa liasü. Asenok India nung alir aser asenok ajak India nungir lir. Asenoki iba linük ya tashi taitba kümdaktsüsü. Onok ajak (yimsü ajak) longjema lir, ta onoki osang ka sangoktsüogo," ta metetdaktsü.

Mahabodhi International Meditation Centre tentetsang aser Tir, Bhikkhu Sanghasena-i, Parliament building tasenba

semdanga Ato kilonser Narendra Modi aser linük tatong tir, Jagdeep Dhankhar na ajuru shisa lemsatepba ya puti otsü tasen ka lir, ta ashi.

Paisa, "Iba linük azükarutsü atema asenok ajak longjemer inyaktsüla," ta ashi.

Ato kilonser ajuru senden amentsü atema sentong yangluba nung Satnam Singh Sandhu-i tongti shilem agia liasü.

Sandhu-i, "Onoki alima dang India ya linük ka ama longjema dang lir aser sorkari 'linük tama' omen nung ajemdaker inyaker ta osang sangoktsünüa liasü," ta metetdaktsü.

Tawa Sandhu ya Rajya Sabha nung züngsem shima liasü.

Linük nung democracy tepsettsü memelatsü: Supreme Court



New Delhi, February 05 (Agencies):

Tawa Chandigarh nung Mayor election nung inyakyim meshidakba dak sendakba nung Hombarnü Supreme Court-i, linük nung democracy tepsettsü atema court-i memelatsü, ta metetdaktsü.

Supreme Court-isa, Chandigarh Mayor election nung returning officer-i inyakba mapa atema pa anema ken o akatsüla, ta ashi.

Supreme Court-i, returining officer-i ballots raksatsüogo, ta ashi.

Aam Aadmi Party aser Congress nati benokba temepishiba ken o ka angadanga sülen Supreme Court-i, "Mayor election agiba inyakyimji democracy ashiochtsüba lir. Returning Officer kati yamai inyaktsüla asü?" ta asungdang.

Election agiba inyakyim ajak video ka nung repringba sülen Chief Justice, DY Chandrachud-i, "Returning officer-i inyakba mapa ya democracy tepsetba lir. Pai camera nung repringer ballot paper raksabaji video nung jangjangja angur. Pai election yamai ketdangsia agir na?. Iba ya democracy ashiochtsüba lir. Iba nisungba anema ken o akatsüla," ta ashi.

Supreme Court-isa election agiba inyakyim ajakji Registrar General of Punjab and Haryana High Court ajanga wazüka ayutsü tuyuogo.

Supreme Court-i iba ken o ano angadangtsü anungji iba ken o mangadang tashi Chandigarh Corporation senden magitsüla, ta tuyuogo.

Supreme Court-isa Returning officer, Anil Masih danga February 19 nü court matsungdangi arua video nung tangoka aliba pai inyakbaji raksa-a ashitsüla, ta tuyuogo.

Chandigarh Mayoral election nung returning officer-i opposition indang vote 8 'magila' kümtsü aser BJP candidate-i takok anguba sülen iba mangatettep adok.

Mayor election nungji AAP aser Congress nati longjemer külem candidate ka toktepdakja liasü. Parnoki election inyakyim ashishia Punjab Haryana High Court nung ken o benok saka court-i magizükba ajanga maneni parnoki Supreme Court nung kasa ken o benoka liasü.



February 05, 2024 nü Lucknow nung Uttar Pradesh assembly nung Finance Minister Suresh Kumar Khanna-i Budget 2024-25 benokdang tangokba noksa nung angur. Kasa noksa nung Uttar Pradesh Chief Minister, Yogi Adityanath-a angur.



Bank of Baroda
Main Bazar Road, Near Old Taxi Stand, Kohima- 797001
Email: Kohima@bankofbaroda.co.in

KOHIMA BRANCH
Main Bazar Road, Near Old Taxi Stand, Kohima- 797001
Email: Kohima@bankofbaroda.co.in

Kiojen ayoktsü atema Sale Notice
APPENDIX- IV-A [See proviso to Rule 6 (2) & 8 (6)]

Securitisation and Reconstruction of Financial Assets and Enforcement of Security Interest Act, 2002 aser Rule 6 (2) & 8 (6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice.

Public asertalisa sen apur(tem), Mortgagor (tem) aser Guarantor (tem) nem iba sangdong agütsür, Secured Creditor dang mortgage/charge asüba tsünglanglen shia aliba kiojen Bank of Baroda nung Authorized Officer agiadokogo, aser iba kiojenji "Kong koma ali", "Koma lidir yamaji" aser "Yangji aliba ajak" tsünglanglen shia aliba account/s nungi sentsüh alangzüksü atema ayoktsü. Sen apur(tem)/Mortgagor (tem)/Guarantor(tem)/alangzükba aliba kiojentem/sentsüh/Reserve Price/e-Auction anogo aser mapang, EMD aser Bid Increase Amount tsünglanglen metetdaktsü-

S/ Lot No.	Name & address of Borrower/s / Guarantor/ Mortgagors	Short description of the immovable property	Total Dues	Date of E-Auction, Time of E-Auction, Start Time to End Time	1. Reserve Price 2. Earnest Money Deposit (EMD) 3. Bid Increase Amount	Status of Possession (Constructive/ Physical)	Property Inspection Date & Time
1.	Mr. Hyungwalo Jeshing Rengma, R/o- H. No. E/A-1/01, Agri Colony, Opp. Stella Higher Secondary School, Kohima, 797001, Mr. Kewetso Mero (Guarantor) New Minister Hill, Kohima- 797001.	Land and building measuring 1500 Sq.ft covered by Patta No. 8364 (New), Plot No. 5531 situated at Agri Colony, Kohima, District Kohima, Nagaland standing in the name of Mr. Hyungwalo Jeshing Rengma. Bounded: On the North by: Property of Seyiekhoh Angami, On the South by: Property of Hyungwalo Jeshing, On the East by: Nullah, On the West by: Property of Seyiekhoh Angami.	Rs. 1,98,87,471.60/- (Rupees One Crore Ninety Eight Lakhs Eighty Seven Thousand Four Hundred Seventy One and Sixty Paise) and interest and other charges thereon w.e.f 30.07.2022.	Date: 21.02.2024, Start Time: 01.00 pm End Time: 03.00 pm	1. Reserve Price: Rs. 3,16,00,000.00 2. Earnest Money Deposit: Rs. 31,60,000.00 3. Bid Increase Amount: Rs. 10,000/-	Physical Possession	19.02.2024 at 1.30 P.M.

Iba kiojen ayoktsü telatetbatem tejangja metetpelatsü atema yimlibilema website link <https://www.bankofbaroda.in/e-auction.htm> and <https://ibapi.in> nung repringang. Iba dak alia bid asütsüpertemi Authorised Officer den Mobile No: 81199 22922 ajanga tongtepretepsü akok.

Mr. K H Zhimo
Authorised Officer
Bank of Baroda

Date: 06.02.2024
Place: Kohima



TIR YIMYIM YIMOBILEM (EDITORIAL)

DIMAPUR SANGTENNÜ, FENRUARY (TSÜKLAI) 06, 2024

Kin ka, temzüng ka!

India ya kin ka dang, anungji senso ajak atema tamangba yimsü, sobaliba aser temzüng ozüng kasa ka dang asütsüla ta India nunger aikati bilemer. Iba tangatetba aser nükjidong yur talisa tang center nung yimsü tesüdak BJP government-i India ajaklen ajak asoshi sobaliba temzüng kasa ka dang asütsü atema meranger. Ibayongji, aiben asenoki linük nung Uniform Civil Code (UCC) nungdakba indang jembiba angashitsü. Uniform Civil Code tetezü nübortem ajak asoshi sobaliba temzüng ozüng kasa dang asütsü. Iba temzüng yagibo Khristan, Muslim aser Hindu sobaliba temzüng balala ajak ya ka dang kümdaktsütsü nükjidong lir. Atangji, kin ka, anungji ajak atema sobaliba temzüng ozüng kasa dang asütsübaji tim dang amai bilemer. Ajisüaka, India ya yimten ka kübok linük ka süaka kinbo tapu aika lir, anungji tamangba yimsü, achi ajem aser sobaliba tsütsü ajak atema temzüng ka dang asütsübaji tamakoktsü asütsü. Iba jagi center government-i linük ajaklen sobaliba temzüng kasa dang amshinüaka mamshitetter, kechiyong kin shia pei tetsü tebuo nungi benschia aruba senmangtsümang, kibalembu, balalulaba aser achiajem yimya aika nung kin o kin na tsüngda kenyongi balala lir. Iba denji ano kibalembu aser balalulaba yabo kin shia tamangba yimsü den sendaktepa lir. Iba jagi kin ka dang süaka tamangba yimsü tsütsü atsünga item sobaliba temzüngtem yabo lateta lir. Ajisüaka, item kin shia tamshidak sobaliba yimya balalatemji khen toktsür, linük nung sobaliba temzüng ozüng ajak asoshi kasa dang sünüba tangatetba aser nükjidong alirtem tsütsüa khen jungjunga bilemdangra, parnoki linük nung ajak atema sobaliba temzüng ka dang yunüba tangatetba aser nükjidongjia majungbo masüa ta angatetsüsa kuli karbo lir. Item kulitem rongnung tongtibangtibaji tebur kati tetsür aika agitsü akokba sobaliba anendaktsür linük ajaklen tebur shia kinungtsü kaka dang ayutsü nükjidong yur inyaker ta angatetter. Atangji, ibaji indangindanger Muslim nunger kibalembuba sobaliba anema lir, kechiyong Muslim yimsü nung dang tebur kati mapang kasa nung kinungtsü pezü den alitsü akoker. Iba jagi tangar kinungtsü ka den dang alitsü sobaliba temzüng alir kintem nütsüng metetmeteta ajema akümdang, Muslim nunger nütsüngbo tangar dang nungi pezüben dak tali agi teimba – teimba küma züiner. Ano, Muslim nunger libaliro aser sobaliba reprangdangra, tebur kati kinungtsü pezü den külemi alibaji dang masü saka tanur soa soyapoktsüba nung parnok kecha tazüokba melii, tanur teimba asotsü tokteper amai khen nung kibong ka agi nisung semer lir tashi küma soyapokyaba angur. Iba jagi tangar kinungtsü ka dang ayutsü melaba kintem asoshi shisabolutsüka lir. Alima nung ya tapu aika jembiyonga nütsüng melira kecha meinyaktet aser teinyakba ajak tangar asoshi inyaktet asütsü. Ano, talisa nübortem rongnung teimbai mulungba nung yimsü asüba yimtena nütsüng teimba aliba kin meyongang kümadoktsü. Aji oda, kinungbo kati kinungtsü asem pezü den külemi aliba sobaliba agidang masü saka ano tetsürtema küm 18 majungdang kibong kümdaktsüba sobaliba agi tetsür aika akümüli nung aiür mesüdang aser kaketshisatsü tajung ngua college azüngtsü maongka mangu, tanur asoba engine amai ka dang küma aliba sobalibattem ajanga linük nung nübortem sobaliba nung liromemedem akümba tebilemtsü tulu kümogo. Item sobaliba tamajungji nokdangtsü asoshi, atangji, UCC ama ozüng ya nungdaker. Ajisüaka, kodang tanga sobaliba dak aketba mapatem senmangtsümang ama nung kongshidir, item jagibo tebenja adokdaktsütsü, kechiyong India nung ali senmang ya teburtemi dang masü saka tetsürtemiang amangba kintema lir. Aji oda, tetsür o tebur na senmang kasasa kümtsüdang, ashiko, teburtemi masü tetsürtemiang memulungtsüa akok.

OLEMSABANG

Tsüngremi lennir asütsü ajaba aser shimtetba

~ L. Kika Pongener.

(Yashi adok nungi...)

Ano nisung karbo pei-i makoktsü sernung, pei sasa ambangyima arishiba-a angutsü. Kenu anogo Dawid o Absalom'er sepoy na tsüngda rara adok, aser iba rara nungji Dawid'er jabaso Absalom tepset, aser iba osangji Dawid dang ashitsü atema Yoab-i par sepoy ka Küsh nungba yoktsü shimtet, saka Ahimaz ta ser sepoy kati, pai osangji Dawid dangi orr sangoktsüdi ta pa sasa meshizük, saka Yoab-i memulong. Yoab-i Küsh nungbaji Dawid chuba dangi osang bener yok, saka Ahimaz-jia pa sasa odang ao, aser Ahimaz jagi Küsh nungbaji ajateter ao, saka kodang chubai kü chir Absalom taküm lir ma ???... ta asüngdang, Ahimaz-i ashi... "Ni rongrongshishi tuluka angu, saka kechi'ar ni tejangja memetet"... ta langzü. Anungji iba osang jagi Dawid temulong masü. Iba sulen Küsh nungba tonga aru... Dawid-i pa danga küsaji asüngdang... Küsh nungbai ashi... "Kü kibur tongpang takok nguogo aser Absalom suogo". Ahimaz-i kechi atalok jungjunga meteter ao, saka Absalom tepsetba osang Dawid chuba dang ashitsü chuba tejak marem tsübo (2 Samuel-18:19-23 tashi nung zünga angutsü). Atangji, lenir karbo Tsüngremi shimba-a masü aser nubur-i shimba-a masü, saka pei sasa ambangyima lenir akümbaa lir. Ajisüaka, konang nungsang, tajung tang aginur, nungsen-bo maginur, ken o tasak aser khuret arudangbo tasü-ita mejembitetba aser ochi o bendang magütsütetba aser takar-tulur dang tejak maremba lennir... Ahimaz amaji karbo lir.

Ano lennir karbo nubur mazüokteti, meshitaka ta metet-aka lokti teimba (Majority) dak tsükdaker aibelenata telemtetba agiba agi nubur dangi atakadem bener aruba lennir karbo lir. Israel purtem Ijip lima nungi Kannan limai aodang len tom nung... Mosa Sinai tenemi ozüng lungpak apeni atuba menua malu, Israel-purtemi Aron dang Ijip lima nung ama sungyanglu külemtsü meshi. Aser Aron-i nubur mesoitte hon, taribi aser yongmin yin bendener Nashi chanu ka molur aji külemdaktsü, aser iba mapa jagi Tsüngrem kanga jashi, aser iba aibelenba mechi, nisung meyi asem shi tepset. Tsüngremi mezüngyongi Aron lennir asütsü meshimba ya, pa dak nisung tejak maremba aser lokti mazüoktetba tashimait ya aliba ngur meshim sudi... ta rajema angateter. Tanü asen putu nunga yimden, arogo aser lokti lennir aikati lokti tuluba (Majority) dak rangloker Tsüngrem jashidaktsütsüsa aibelenata telemtetba agiba ajanga nubur dangi atakadem bener aruba lennir karbo lir. Lennir aikati lokti tuluba/nutsüng teimba peladaktsütsü merangdang, aiben Tsüngrem jashidaktsür, aser idangji pei lima aser nubur dangi atakadem bener arur.

Temeim lennir tajungtem, na-a Tsüngremi shimtetba lennir ka asü (?) Mesura ne sasa lennir akümba lennir ka (?) Ne lennisuba nung nuburtemi pelaseta anidaker asü manidaker (?) Ano ne lennisuba nung loktiji tejakleni aor asü maor (?) Naine nem nungloktsüba mapaji akoker asü makoker (...ta khen ne sasa asüngdangang. Yisu-ibo pa sasa paji nuburtemi shiba-a... ta ashir... aji kanga metetnua bushi (Mathi-16:13-17). Temeim lannir tajung... Na ya ner nuburtemi shiba-a... ta ashir (...aji asen sasa khen bushidangtsüla. Lennir tajung kati pei sasa pei taküm bushir, pei tashimait metettsü meranger aser nubur taginuba angatetsü meranger. Lennir tajung kati Tsüngrem aser nubur mulong chidaktsütsü meranger. Lennir tajungi pei ajaba angatetsü meranger aser nubur taginuba angateta tenzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

China nung ketdangsertemi Khristan 200 dak tema puogo

February 05, 2024: Reformation Movement Northeast China nung police-i Khristantem adenshia aliba tesem ka mita aoba sülen Khristan 200 dak tema puogo.

China sorkari melaba association nung densema maliba Arogo ka nung adenba atema yimdaklir Khristan noklang ana dak tema apu.

January 27, 2024 nü Heilongjiang province nung police-i Mudanjiang City kübok Xiaotuan yim mita aoba mapang Khristantemji apu, ta February 5 nü Bitter Winter-i metetdaksü.

Bitter Winter ya online magazine ka lir aser parnoki China nung yimsü temeden aser meimchirtem temeden anema inyakba mita repranger.

Police-i apuba Khristantemji Sola Fide (Justification by Faith) network kübok house church nung züngsemtem lir.

Latin oshi nung 'Sola Fide' tetezü "tamang kija" lir aser iba ya Germany nunger Laishir aser Aso 16buba mapang nung

Police-i mita aoba sülen tenzüksang, Martin Luther indang tesayuba lir.

Martin Luther-i, Tsüngrem nungi teindangji asenoki inyakbatem masü saka Tsüngremi yanglutetba lir. Iba tangatetba ya Protestant Arogotem aikati benschir.

Ajisüaka China nungbo sorkari ketdangsuba Three-Self Church-i Protestant Arogotem reprangba ajanga Martin Luther tesayuba sendoker.

Ita shia Khristantem yimsüing balala nungi Xiaotuan yimdak adenshia tekülem sentong agir, ta Bitter Winter-i metetdaksü.

Yimdaklir Khristan kati, "Onoki kodanga khen nung police aika aruba mengudangi liasü. Khristantem adenshia aliba mapang nung yimdaklirtemi melung malemtsüsa gari ka angu; iba gariji anepdang züngia aru aser aonung tepiyong liasü," ta metetdaksü.

Police-i mita aoba sülen Khristantemji bus asem den gari kar nung anir ao, ta Bitter Winter-isa metetdaksü.

Pua anir aoba Khristantemji tang kong aliar memetet, ta parnokisa metetdaksü.

2013 küm Xi Jinping China Tir akümba mapang nungi tenzuka tamangba yimsü balala amangertem, talisa Three-Self Church nung register süa maliba house churches nung züngsem Khristantem anema inyakba kanga bulua kümogo.

2018 küm Chinese Communist Party (CCP)-i yimsü dak sendakba ozüing tasen kar agizükba sülen item ozüing kübok tamangba lokti balalai sorkar den registration agitsüla aser jelia temelaba meshiba sülen ang maparen balala inyaksüla.

China linük temzüng nungbo senso ajak nem yimsü temeden agüja lir, ajisüaka Tsüngrem dak mamangba communist sorkari linük nung yimsü temeden anema inyaker.

ANOGO ABEN TSÜNGREM DEN

Tebui na atsür

Aser Pai ashi, iba asoshi Tebui magütsüra shingai kü dangi arutsü makok, ta ni nenok dang shiogo. Yohan 6:65.

Yisui tenzükba mapang tepiyong teloki ajanga Pa memetetdaksü. Paiang telok dak reprang aser Tebui shiba Pa dangi yoker pa/la dak ranglok. Temenen ali nung, yimya shingai Tebu mebushir ta Yisui meteta liasü. Temenen nisungi Tsüngrem dangi arutsü melen, Tsüngrem nungi atsüka alitsü bushir (Lipok 3:8; T.Ken 14:1-3). Aji asü, kodang Tebui nisung ka Pa dangi atsüba ngudir idangyongjisa Pai iba nisung den sendakteptsü tenzük.

Talang nungi ali melen sarur, Zakiai Pa süiba reprangtsü asoshi aoba repranga liasü. Idangyongjisa Yisui telokji toktsür iba nisung dangi ao shiba dang Tebui mapa inyaka liasü (Lk. 19:1-10). Kodang Yisui nisung ka Pa dangi aruba metet, Yisui Andria den jemi, "Arung" (Yn. 1:39). Mapang ajak nung nütsüngtemi Tsüngrem ochiba tangatetba tasen-tasen angu, Yisui ibaji Tebui parnok taküm nung mapa inyaker ta angatetta liasü (Matt. 16:17).

Telokti Pa dangi sentepdang, Pai ochi O kar jemi koba telok asoshi angatettsü tasak liasü (Yn. 6:60). Pa O tayongzükba tulu liasü, aji asünung Pa dang angashirtem meyipa oa adok, saka Yisu kodanga tasü meiti maküm. Pa nütsüngtem taküm nung mapa inyakba Pai angu aser iba asoshi Pai mapang agütsü.

Nai kija Yisu den mapang intokdang ibai Tebui Techir dangi atsüba ta angatetang. Tsüngrem metettsü/ajurutsü asoshi nai Pa den kija mapang meintoker. Nai Laishiba azüngdang aser sarasadem dang, Tsüngremi telangzüba agizüktsü aser Pai Pa indang tali sayutsü ta amangang.

Osangtajung kentener Kirk Franklin-i Grammy Award angu



February 04, 2024 aonung Los Angeles, California nung 66buba GRAMMY Awards sentong nung osangtajung kentener, Kirk Franklin-i Best Gospel Performance/Song award agizükba sülen o jembidang tangokba noksa nung angur.

February 05, 2024: Khrista osangtajung kentener nungtu, Kirk Franklin-i Grammy Award 20buba nguogo; Amongnü (February 4) Grammy Award sentong nung pai 'All Things' ken ajanga Best Gospel Performance/Song award angu.

66buba GRAMMY Awards sentong ya February 04, 2024 aonung Los Angeles, California nung agia liasü.

Khristan rap kentener, Lecrae-ia Grammy award ana- Best Contemporary Christian Music Performance/Song aser Best Contemporary

Christian Music Album award nguogo.

Award anguba sülen pai Instagram post ka ajanga, "Ni tang tashi mamangteter. Ni pelar saka iba ya kü shisatsü agi mangateter. Ni tebu balaka sünur aser ozü chirnurtem nem aika ajangshidaktsüner. Tsüngrem ya taochi dang nungi alakteta lir. Kodang ni rajemdir ni nenok den lemsateptsü. Tang ni Tsüngrem taochi atema Pa dang pelar. Nü yimli nung ni dendaktsüba aser taneptsüba ken atentsü atema teraksaba kongkitem amshiba atema Nü dang pelar, Yisu," ta lemsatep.

Grammy Award Christian categories nung takok angurtemji yamai liasü: Best Gospel Performance/Song award Kirk Franklin - 'All things'; Best Contemporary Christian Music Performance/Song- Lecrae & Tasha Cobbs Leonard - 'Your power'; Best Gospel Album- Tye Tribbett - 'All things new: Live in Orlando'; Best Contemporary Christian Music Album- Lecrae - 'Church clothes 4' aser Best Roots Gospel Album- Blind Boys of Alabama - 'Echoes of the south'.

ICC-i Chhattisgarh nung Khristan aluyimertem nem teyari agütsü

February 05, 2024: India kübok Chhattisgarh state nung Hindu yimsü alia amangertemi nütsüng kanga ajema aliba Khristantem kanga

Ano aluyimer kati, reshikangshir; tawa Khristantem anema inyakba tatalokbatem ajanga Khristantem taküm lendong nung aliba tensa sayur, ta International Christian Concern (ICC)-i metetdaksü.

Tawa Chhattisgarh nung Hindu yimsü alia amangertemi Khristan aluyimertem telok ka amak.

Khristan aluyimer kati, "Yaküm onok alu nung tsünüsempongtsü junga dang liasü, ajisüaka ajungbena telok kari onok anema apuso aser alu nung aonsotsü ajak shirurtemi chitsü," ta metetdaksü.

"Onok ket nung chiyungtsü mali kanga timtemer. Alu ayimtsü atema onok ket nung metsüh aser fertilizers mali. Onoki Kibuba dak dang yimlar aser Tsüngremi yaritsü ta amanga atar," ta paisa metetdaksü.

International Christian Concern (ICC)-i Khristan aluyimer 50 aser parnok kibongtem nem metsühjang aser

fertilizers alia agütsüogo, koba ajanga aluyimertem parnok taküm tanaben asentenshitsü atema yaritsü.

"Aluyimtsü atema metsühjang aser fertilizers maliba ajanga kibong ka ama onok kanga timtemogo. Ajisüaka Tsüngremi ICC ajanga onok nem nüngdak ajak agütsüogo. Iba ya onok asoshi teyari tulu," ta ashi.

"Chhattisgarh nung Khristantem anema inyakba jenjang tamajungba akümba ya tebilemtsü onük tuluka kümogo," ta ICC-i metetdaksü.

Tang India nung Chhattisgarh densema state 11 nung anti conversion ozüingtem benoka lir, aser item ozüing nung ajemdaker Khristantem nem tai tonglokja apur.

Yaküm Khristantem anema inyakba tatalokba teimtibaji Uttar Pradesh nung liasü, iba sülen tanabuba jenjang nung Chhattisgarh liasü.

United Christian Forum (UCF)-i, yaküm küm piyong nung India linük nung Khristantem anema inyakba tatalokba 720 liasü, ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Shishilembaba

(n) senotsü tajangzük atema ayokba aser aliba (trade , business)

* Tsümartemi dang shishilembaba mapa ya junga inyaker.

Shitak

(v) tai masü, tiyazü masü, ochi (right, accurate)

* Imtibai tatidang nung tasüngdangba ajak shitak langzü.

OLONG PAITEP # 6689

Grid for crossword puzzle #6689 with numbered squares.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6688 TELANGZÜBA

TIPIEN :

- 1. Tanga, 6. Wara,
7. Rajang, 9. Anük,
10. Jenjang, 11. Alar,
14. Ngashi, 15. Nala,
16. Mechi.

LANGTSÜNGLEN :

- 2. Anga, 3. Yabang, 4. Tarok,
5. Orak, 8. Ainer,
9. Anema, 10. Jabili,
11. Among, 12. Miim,
13. Anem.

NAI-A YA METETTER MA

Innovativezone

ZYBER 365

MEET PEARL KAPUR, WHO CREATED A ₹9.840 CRORE COMPANY IN JUST 3 MONTHS



India nung billionaire tanubosangji Web3 startup Zyber 365 founder aser CEO arishi küm 27 tain Pearl Kapur lir. Pa indang rongsen \$1.1 billion lir. Pearl Kapur ya Queen Mary University of London nung azünger ka lir aser pai Investment Banking (CFA Pathway) nung MSC renemogo. May 2023 nungi lai entrepreneur mapa tenzük aser Zyber 365 Technologies Ltd (UK) nung pa indang shilem 90% lir.

Zyber 365 ya Indian-origin entrepreneurs Pearl Kapur (Founder & CEO) aser Sunny Vaghela (Co-founder & CPO) nati tenzük aser iba company yagi EVM Compatible Web3 Layer 1 Proof of Authority (PoA) sustainable chain mapa inyaker.

Mizoram CM Lalduhoma-i Fire Prevention Week 2024 tenzüksü



Aizawl, February 5, 2024 (Agencies): Mizoram Chief Minister Pu Lalduhoma-i Synod Conference Hall nung Fire Prevention Week 2024 lapoktsü.

Fire Prevention Week ya 2000 küm nungi tenzük aser Mizoram nung taküm agi küm 24 buba mongogo.

Nübertemi mi nungi ali kümzüka ayutsü atema mapa inyaksüla.

Arem rongdoktsürtem ozüng amertemi merenshitsu la ta Chief Minister

Lalduhoma-i ashi.

Iba sentong nung EF&CC Minister aser State-Level Sub-Committee on Fire Prevention Chairman Lalthansanga-i tongti tesemdang ama shilem agi.

Sentong nung PCCF & State-Level Committee on Fire Prevention Member Secretary

Ashok Kumar Biswal, IFS-i Fire Prevention Week osang metetdaksü aser APCCF & Member Secretary, SLSC on Fire Prevention Kamal Preet,

IFS-i tesentepertem pela agizük.

Taküm Fire Prevention Week indang omenji 'Let us work together to prevent fires' lir. Kümshia February ita mezüing hopta tatemlen Fire Prevention Week amonger.

2000 küm nungi Mizoram-i dang Fire Prevention Week monga arur aser iba ya Forest Fire Prevention and Management Scheme (FFPM) indang central scheme ajanga amonger.

Assam sorkari Sewa Setu Portal lapoktsür; Services 500 tema lir

Guwahati, February 5, 2024 (Agencies): Assam sorkari nübertem yaritsü asoshi Sewa Setu Portal ka lapokogo aser iba ajanga sorkar service 500 tema teyari agütsür.

Iba portal nung applications crore 1 tema aruogo aser iba nungi 85% tashi mapa inyakogo.

Iba sabang ajanga senso kishizüing tashi government services bentsür aotsü aser ketdangsubaren balala zübazüba inyaka aotsü.

Sewa Setu indang official website nung services aika agütsüba shia lir.

Iba portal ajanga ARTPS Notified Services, Services Available Online, PFC Services,

CSC Services, Land & Revenue aser Popular Services links agütsür.

Sewa Setu Portal temetetsütem:

> Departments/directorates 47 aser Autonomous Sixth Schedule Councils 3 nungi services 541 lir.

> December 30, 2023 nü services 26 tashi live tenzük.

> Sewa Setu Portal nung Autonomous Councils 3 kübok services 50 tema dendaktsüogo.

> Sewa Setu Portal nung Contractor Registration services, Doctors' Registration services, Students' certificate/registration/ Exam admit-related services lir.

> Mission Basundhara 2.0 aser Bodoland Territorial Council atema Mission Bwiswmuthi kübok land settlement-related services dena lir.

> Sewa Setu Portal nung Assam Police, Minority Certificate, Gorkha Community certificate, Building permission, Property Tax aser Trade licenses kübok services lir.

> Districts & councils ajak densema Public Facilitation Centres 362 lapokogo.

Sewa Setu Portal nung services 500 tema lir aser iba ajanga sorkari tashishitsu melii aser loktii shilem agia inyaksangshitsu tenangzüka kuli sayur.

Anglo-Kuki War Centenary Gate ya ozüing alema yangluba



Imphal, February 5, 2024 (Agencies): Manipur nung ashishitep aketba Anglo-Kuki Centenary War Centenary Gate ya ozüing alema yangluba liasü ta RTI reply ajanga metetdaksü.

Republican Party of India (RPI) lennir Maheshwar Thounaojam-i RTI tasüngdangba agütsüba January 30 nü telangzüba angu.

Anglo-Kuki Centenary Gate yanglutsü atema tetuyuba mesüra temelaba kecha mali ta Public

Works Department-i metetdaksü.

Public Works Department-i National Highways nung advertisement hoardings, signboards, banners, statues agientsü shidi ka December 19, 2022 nü Churachandpur Deputy Commissioner nem agütsü ta RTI reply nung shia lir.

Anglo-Kuki Centenary War Centenary Gate ya Churachandpur district kübok National Highway No 2 nung lir.

Yaküm May 3 nü Manipur nung kin o kin tsüngda mepetmesü adokba sülen iba gate atema ashishitep tenzüka liasü.

Iba gate ya Leisang yimtsüing nung lir aser 1917-19 Anglo-Kuki war bilemteta yangluba lir. Ajisüaka iba rara atema ashishitep ken o aika lir.

Yaküm Union Home Ministry-ia Manipur nung Anglo-Kuki War dak sendakba record mesüra details kecha mali ta shiogo.

MetLife Stadium nung 2026 FIFA World Cup final asayatsü

Tsüklai/February 5, 2024 (Agencies): 2026 World Cup final MetLife Stadium, New Jersey nung July 11 nü asayatsü ta FIFA-i sangdong ka ajanga metetdaksüogo.

Alima nung nungtugutiba asaya ya United States, Canada aser Mexico kübok yimti 16 nung asayatsü, ta FIFA-isa Deobarnü metetdaksü.

Team 48 asayaba asayamung ya June 11 nü Mexico City kübok Estadio Azteca nung asaya tenzüksü aser July 19 nü East Rutherford, New Jersey kübok 82,500-capacity MetLife Stadium nung asaya tembangtsü.

Canada nung group stage 10 densema asaya 13 asayatsü, koba Toronto aser Vancouver

na nung kasa lemdanger asayatsü. Mexico nunga asaya 13 asayatsü, kong group stage asaya 10 densema lir. Mexico nung asayatem ya Mexico City, Guadalajara aser Monterrey nung asayatsü. Asayamung nung tanungba asayatem ajak US nung yimti 11 nung asayatsü.

Toronto, Mexico City, aser Los Angeles nung parnok national team tem asaya mezüngbuba asayatsü.

Final atema open-air stadium koba USD billion 1.6 intoka yanglur 2010 küm lapoka liasü, iba stadium nung 2016 küm Copa America Centenario final asayaogo, kong Chile-i penalty nung Lionel Messi-i aniba Argentina team tsükdakja liasü.

Mexico ya World Cup asembenbuba ayongzüka asayaba mezüngbuba linük akümtsü.

Mexico nung 1970 aser 1986 küm World Cup ayongzüka asayaogo aser asayamung anaprongla final ya Estadio Azteca nung ayongzüka asaya . 1970 küm Pele-i aniba Brazil team-i Italy 4-1 agi akok aser 1968 küm Maradona-i aniba Argentina team-i West Germany goal 3-2 agi koka liasü.

Canada nung tang tashi World Cup ka danga ayongzüka asayadanga mali aser 2026 küm mezüngbuba asaya ya June 12 nü Toronto nung asayatsü aser US nunga Los Angeles nung mezüngbuba asaya asayatsü.

Egypt-i coach Rui Vitoria mapa nungi anentsüogo



Tsüklai/February 5, 2024 (Agencies): Egypt team Africa Cup of Nations nung junga masayatetba sülen Egypt indang Portugal nunger coach Rui Vitoria aser pa indang staff tem Deobarnü mapa nungi anentsüogo.

Team asayaba yimya asadangtsü atema director tem ajuruteba sülen Egyptian Football Association-i Vitoria aser pa indang assistant tem nem tenüngsang agüja liasü.

Egypt team-i Africa Cup ya otsüsütsüsa tenetben koker lir, ajisüaka taküm parnok iba asayamung round of 16 nung penalty metsütepba sülen Congo-i tsükdakja liasü.

Egyptian federation-i ashiba agi, bendanger technical director ka aser tanungba staff tem meshim tsüngda taoba mapang Egypt and Al Ahly defender Mohamed Youssef Federation-isa, director temi taruba senden nung bendanger coach tem indang resume tem asadangtsü ta ashi.

Osang ajanga ashiba agi, France nunger coach Herve Renard-i pa France tetsür team coach mapa bona aliba toktsüba sülen Egypt national team coach mapa agizüktsü atema mulunga agizükogo.

Renard lenisüba nung 2022 World Cup nung Saudi Arabia team-i Argentina koka liasü aser Ivory Cost-i parnok indang coach Jean-Louis Gasset mapa nungi anentsüba sülen Africa Cup nung tanungba asayatem pa lenisüba

nung asayatsü atema loan nung anir arutsü asüngdanga liasü.

Vitoria, shiba 2022 küm, küm pezü atema Egypt coach asütsü shima liasü, pa lenisüba nung team-i takok tajung mongutet. Taküm Africa Cup group stage nung Egypt team Mozambique, Ghana aser Cape Verde den asaya ajak goal 2-2 nung dang tembanga liasü aser tatemsa Congo penalty nung mekoki liasü.

Group stage nung tanabuba asaya Ghana den asayaba mapang Mohamed Salah hamstring yiruba aser Cape Verde den tasembuba asaya nung No. 1 goalkeeper Mohamed El Shenawy tapu yiruba sülen team tia melenshidaktsütsü meranga Egyptian federation-i nashi ka tenla agüja liasü.

Ajisüaka Congo den asayaba mapang reserve goalkeeper Mohamed Abou Gabal-i metsüba penalty crossbar nung ondakba sülen parnoki asaya makok.

Africa Cup asayaba mapang coach tem aika mapa nungi anentsüogo. Ghana coach Chris Hughton mapa nungi anentsüogo aser iba sülen Ivory Coast coach-a mapa nungi anentsü aser asaya ka dang asayaba sülen Tanzania coach-a mapa nungi anenja liasü. Maneni Gambia coach-i mapa toktsü aser Senegal coach mozükidangi anir oa liasü. Team asayamung nungi tsükba sülen Tunisia coach indang contract tembanga liasü.

WTC ranking nung India team tanabuba jenjangi tuogo

New Delhi, Tsüklai/February 5 (Agencies): Vizag nung England den tanabuba Test asaya run 106 agi akokba sülen Hombarnü India team ICC World Test Championship 2023-25 rankings nung tanabuba jenjangi tuogo.

Hyderabad nung mezüngbuba Test makokba sülen India team WTC rankings nung tanabuba nungi pongububai asepzüka lua liasü.

Ajisüaka Hombarnü takok anguba sülen India team maneni tanabuba jenjangi tuogo aser Parnok Australia

sülen lir. Iba asaya akokba tetezü, England den Test asaya pongu asayatsü aliba nungi kaka kokogo.

Iba asaya akokba sülen India team point percentage 52.77 kümogo.

South Africa, New Zealand aser Bangladesh, tasembuba, pezübuba aser pongububa nung lir aser top five team ya point percentage 5 agi dang pilar lir.

Vizag nung asayaba Test mezüngbuba innings nung opener Yashasvi Jaiswal-i pa indang Test career nung mezüngbuba double century

yanglua liasü.

Kasa asaya tanabuba innings nung Shubman Gill-ia century yanglua liasü. Pa Test asaya nung no. 3 nung asaya arudar.


Iba asaya nung pacer Basprit Bumrah-i kanga junga asayaogo aser innings ana nung pai wicket 9 agia liasü. Ajisüaka spinner tejen Ravichandran Ashiwn-i wicket ka danga magiteti pa wicket 499 nung dang lir.

India aser England na tasembuba Test February 15 nü nungi tenzüka Rajkot nung asayatsü.

Belgium, France, Argentina Davis Cup final-i iogo



Belgium



France



Argentina

Tsüklai/February 5, 2024 (Agencies): Deobarnü Belgium aser Croatia na asayaba mapang Zizou Bergs-i tatembangbuba asaya koka Belgium team Davis Cup Finals-i iogo aser France-ia Taiwan koka parnoka final tongtetogo.

Sander Gille aser Joran Vliegen nati tarep asaya nung 2-6, 6-3, 7-6 (7/4) agi Ivan Dodig aser Mate Pavic na koka Belgium tejakdang toktsü. Honibarnü kija asaya ana team anapronglai kaka koker liasü.

2019 küm Davis Cup format melenshiba sülen Croatia team tang mezüngbuba final nung masayatetsü.

Taküm group phase asaya

September ita asayatsü aser knock-out stage Malaga nung November ita asayatsü.

France aser Taiwan na asaya nung Honibarnü France team-i kija asaya anaprongla koka parnok tejakdang liasü aser Deobarnü Edouard Roger-Vasselin nati Hsu Yu-hsiou aser Jason Jung na 3-6, 6-2, 7-6 (7/1) agi koka parnoki asaya akok.

Kasa mapang nung Czech Republic-ia Deobarnü Israel 3-0 agi kokogo.

Asaya nung Israel nunger tarep asayar Cukierman yiruba ajanga asaya tema masayatetsüsa aküm aser ibayongji Tomas Machac aser Adam Pavlasek nati asaya

akok. Argentina team-a Kazakhstan 3-2 agi akokba sülen final tongtetogo.

Asaya nung Argentina team 2-1 agi tejakdang liasü ajisüaka Kazakhstan team-i asendenshir kanga junga asaya tenzük aser kija asayartemi asaya ana koka kasasa aküm, ajisüaka tatem nungbo Argentina-isa asaya koka liasü.

Slovakia, Netherlands, Finland, Germany, Brazil, USA aser Canada nungera hopta tatem qualify süogo.

Defending champions Italy aser taoba küm runners-up Australia, Britain aser Spain nunger ajak finals atema automatically qualify süogo.

BILEMDANGANG

"Temaba jenjang tongtetertemi bilema makazüi inyaker."